
Baixo a mirada d'os Fustetz

FERNANDO ROMANOS HERNANDO

edicions *TRANSIBERIANO*
ІВНІСІРІБІРІАНО

-colección poesía -
UELOS NEGROS

POEMARIO

A historia d'o peix-engardaixo

Yere yo feliz
estando inexistencia
pero tenié que ubrir os míos uellos
por primera vez, en a era d'o seiscientos
quan as ciudatz creixeban
 quan a simient d'a crisi naixeba
 quan os lugars s'amortaban
 quan a chent fuyiba
 d'a vida y d'as radices

No sabebe encara
fablar diametralment mica parla
pero me metión a escape
en a cambra de vivir a vida a boldregons
con galochas semitrasparents
con suenios fluorescentes
 de lunas embabiecadas en creixient
 de lunas perdidas fendo a fuyitina a o rustil d'a vida

Os míos ploros tinglaban
como qualque disco esnafrau
que fa trancar as finestras
d'as boiras aburridas

Quan paroliar estió ta yo
como ta os ratos esforigar
plorabe ya alavez no más
quan apretaban as mías arterias
foranos esparpiellos matematicos
en forma de pulpo

Conoixié pues
os moluscos
muito antes de ficar os míos pietz
en a nueit mullada y salada

D'as fuellas d'os míos libros insensatos
chinchorriaban a gorgollons
codetes
ninons
soldaus
dragons
fabirolos y vulturnos

Por cada vez que deixé os míos libros
tresbatius debaixo d'o petalo d'una flor
no en sé quantas, que deixé a cabeza
redolando por as mías basemias
volando en bell calaixo de nieu
u en andalans d'arbols embardaus
 entarquinaus de tiempo inerte y sondormiu

Ya alavez yere peix
y tenié que adaptar as mías ganyas
ta pervivir debaixo d'a superficie d'a vida

En ixe mundo empacinau y fosco
no i viviba guaire chent
tenié que adedicar-me a fer castiellos
d'anforas preludiadas en azul
de golondrinas escafandristas
y de coscaranas lasas
que s'enfongaban en o mío mundo
feriosament aspavientario

A pur de minchar rosarios
y rezar tarchetas de vesita
a pur de veyer a dios entre cristianos
escaciladors de dogmas pancreaticos
facié empanadillas de concencia
analitica y refusadera

Consiguión tot lo contrario
de lo que quereban
os balleners, fosquizos y motilons
yere yo, encara un peix
que viviba debaixo d'a superficie

Bella vez un barbol y yo
salibanos, chanfuraliabanos, chapurquiabanos...
nos esbulligabanos en a espunya d'una placha solitaria
baixo a no riseta d'a luna perdida, simient d'a luna que creix
y nos faciό goyo de fer-lo
y lo faciemos a sobén
y soniabanos con a luna perdida ta salir de l'augua

As primeras rayadas de l'alba
estrucación as nuestras pelletas escamosas

As especies de difuera
yeran prou distintas
dormiban platos de sopa
en cunas de dragons platiaus
estiό dificil de fer-se-ie

O sol nos feba vergonia en os uellos
galapatonie a tentón bell tiempo

Ubrié os uellos por segunda vez
quan as nueitz grizas fumiaban
y tamboriniaban en as carreras

Ubrié os uellos...
veyebe chent que correban con os brazos
que charraban con os musclos pretos
que esgangoliaban con as orellas

M'apuntón tamién alavez
a emplegar os míos sentius
me torné peix-engardaixo
y empecipié a esturrizar-me por a vida

Pels de cardo

Cantaban a capela por dezaga d'o mío esmo
mientras o futuro, terne y royo
no quereba acucutar encara
por entre a riseta trafucosa y bufina
d'un horizont traidor de tierzopelo

Viella bruixa Blasca
te pilló en galafatón a maitinada
contando es pels d'un ixuto cardo
y a yo m'engalzaba a nueit
mientras rechiro es bolos d'a glera
y palpeyo cantals fríos y inertes
mientras es días d'o calendario
cantan a suya despedida

Esnavesando monts
entre torrumbescas y boirotas
m'ixuplidé
que no creixen es buixos en a Tierra Plana

Talmén sía tarde ta fer-me chardinero